

Inatsisartunut Naalackersuisunullu il.il. ilaasortat aningaasarsiaqartitaanerat il.il. pillugit Inatsisartut inatsisaata allanngortinneqarneranik Inatsisartut inatsisissaattut siunnersuut.
(Suleriaatsimut Ataatsimiititaliaq)

Saqqummiussissut
(Inatsisartut Siulittaasoqarfiat)

Siullermeerinninneq

Siunnersuutikkut matumuuna Inatsisartunut Naalackersuisunullu ilaasortat aningaasarsiaqartitaanerat pillugu inatsimmi allannguutissatut siunnersuutit arlallit saqqummiunneqarput.

Inatsimmi 2003-meersumi kingullermik 2006-imi allanngortitsisoqarpoq soraarnerussutisiaqarnermut tunngasut taamanikkut allanngortinneqarlutik. Piffissap ingerlanerani inatsimmi aalajangersakanik allanik allanngortitsisoqarsimangilaq.

Inatsisartut Naalackersuisullu siulittaasuisa Naalackersuisunullu ilaasortat allat ineqarnermut akiliuteqartarneranni allanngortitsisoqarnissaa siunnersuutigineqarpoq.

Siulittaasut eqqarsaatigalugit taakku 2001-imiilli ineqarnermut akileeqataassutigisarsimasaata kisitsit akinut iluarsissutaasartoq malillugu iluarsineqarnissaat siunnersuutigineqarpoq. Peqatigitillugu siunnersuutikkut saqqummiunneqartukkut ilaatigut ullumikkut nammineq piumassutsimik aqqis-suussineq, tassalu Naalackersuisunul ilaasortat ineqarnermut akiliutaat pisortat inissiaataanni attartortittakkani ineqarnermut akiliutaasartunut sanilliullugu naatsorsorneqartarluni taassumalu iluarsineqartarneratut iluarsineqartarluni, inatsisitigut tunngavissinneqassaaq. Akerlianik aamma isiginiar-neqarsimavoq ilaasortat taakku ilaat aamma marloqiusamik ineqarnermut akiliuteqartarmata illoqarfimmi angerlarsimaffigisaminni aamma inissiaqarnikkut.

Pisinnaatitaaffiit arlalippassuit Inatsisartunut ilaasortanut atuuttut inatsisissatut siunnersuutikkut aamma Naalackersuisunul ilaasortanut atuuttussanngortinniarneqarput, taamaalilluni Inatsisartuni qinikkat Naalackersuisunilu naalackersuinermik suliallit qinigaanngikkaluartut assigiimmik pisinnaatitaaffeqalerniassammata.

Inatsisartunut ilaasortat ullumikkut periarfissaqarput Nuummi inissiaqartinneqarnissaminnut. Tamatumunnga atatillugu pisattat assartorneqarnerannut aningaasartuutit matussuserneqarsinnaatitaapput. Pisinnaatitaaffik tamanna aamma siunnersuutikkut Naalackersuisunul atuuttussanngortinniarneqarpoq, taakkumi Inatsisartunut ilaasortatut pinnatik Nuummi najugaqarnissamut pisussaaffeqarmata.

Inatsisartunut ilaasortanut atuutereersutut Naalackersuisunul ilaasortat qanigisat toqunerini napparsimarulunneriniluunniit kiisalu naartunermit, erninermut meeravissiartaarnermullu atatillugu aningaasarsianit ilannganneqaratik sulinnngiffeqarsinnaatitaalernissaat aamma anguniarneqarpoq.

Ukiuni kingullerni isumalioqatigiissitani sulinerit annertuut aallartinneqartartut tunngavigalugit taamatuttaaq tunngavissinniarneqarpoq siunnersuisoqatigiinni ataatsimiititalianilu taamaattumi immikkut oqimaatsunik suliaasaqartitaasuni siulittaasut ilaasortallu illersorneqarsinnaasumik aningaasarsiaqartinneqarsinnaanissaat. Malittarisassat maannamut atuuttut isumalioqatigiissitani ilaasortanut allanullu piginnaasat naapertorlugit aningaasarsiaqartitsisinnaaneq killilersimavaat. Tamatu-

munngalu atatillugu ilanngullugu oqaatigineqassaaq aalajangersakkap qaqtiguinnaq atorneqartar-nissaa naatsorsuutigineqartariaqarmat.

Naggataatigut ilisimatitsissutigissavara inatsimmi matumanerpiaq, tassa danskisuuani, oqaatsit landsting aamma landsstyre namminersorneq pillugu inatsisip malitsigisaanik kalaallisut taaguute-qalerneru immikkut maluginiagassaammat.

Taamatut naatumik oqaaseqarlunga inatsisissatut siunnersuut Inatsisartunut oqaluuserisassangor-tippara ilassilluarneqarnissaa neriutugalugu.